

ALAHADY FAHA 28 MANDAVANTAONA - A



ANTSOIN'NY TOMPO HANKEO AMIN'NY FANASANY ISIKA

Ry Kristianina havana, antsoin'Andriamanitra isika ary indrindra ao anatin'izany hasambarana ho Olo Araiky sy fianakaviambe ao Aminy ka amin'izao Alahady faha 28 mandavantaona izao dia antsoin'Andriamanitra tokoa isika amin'ny fanasana lehibe iombonana aminy ka hazahoantsika ny tena hasambarana ary efa mampitsinjo antsika sahady amin'ny fiafarantsika koa. Averimberintsika matetika fa ady sady dia ny fiainana, ADY amin'ireo fakam-panahy manapotika sy mitady handrendrika antsika, tsy hahaizantsika mandavorary ny fiainantsika, tsy hahazoantsika ny tena fiadanana sy ny hasambarana, DIA mankany amin'ny tena fiainana, dia ny fiainana maha

zanak'Andriamanitra ka hasanan'ny Tompo antsika ankehitriny.

Ry Kristianina havana, aoka ho fantantsika fa ny lohahevitra momba ny fampakaram-bady dia lohahevitra lehibe ao amin'ny Baiboly fa indrindra ao amin'ny Testamenta Taloha, ambaran'Andriamanitra ny fifandraisana sy ny fifampitondrana ao amin'ny fifanekem-pihavanana izay manambara tokoa fa

iray aina aminy isika, ka io fanasana io manambara ny fiombonana amin'Andriamanitra. Ny tian'ny vakiteny voalohany antintranterina amintsika dia Andriamanitra manasa antsika sy manambara an'ilay faminiana sy ny faniriany hatramin'ny voalohany mba ho fianakaviam-be ao aminy. Manambara Izaia mpaminany fa tsy ny vahoakan'Israely ihany no nanomanan'Andriamanitra an'izany fa ho an'ny olombelona rehetra ary dia tanteraka ao amin'i Jesoa. Izany no ankalazaintsika amin'ny Eokaristia mba hiombonantsika aminy tokoa sady mivelona isika no misantatra an'izany fanasana izany amin'ny fankalazana ny Eokaristia.

Vakiteny I : Iz. 25, 6-10a

Tononkira : Salamo 22

Vakiteny II : Fil. 4, 12-14. 19-20

Evanjely : Mt. 22, 1-14

Matetika averintsika fa ny fankalazana tsy ho fahatsiarovana fotsiny, tsy fanasan'ny Tompo fotsiny fa ny Eokaristia noho asan'ny Fanahy masina, izay no maha sakramenta azy, dia famantarana sady santatra ilay fanasana lehibe iombonantsika sahady-amin'Andriamanitra fiainan-koavy ka hazahoantsika ny tena fiadanana sy hasambarana ary hafaliana feno. Izany no mahatonga antsika rehefa mandray kominio izay teny frantsay midika hoe fiombonana, miombona an'i Kristy mpandresy isika ka mandray anjara amin'ilay fifanasana, rehefa lazain'ny pretra hoe Vatan'i Kristy, noho izany aoka isika samy hamaly Amen izay midika hoe "ho tanteraka toko anie izany" fiekempinoana hanambarantsika an'izay tena fiombonana izay.

Henontsika ao amin'ny Evanjely fa nanao fanasana tokoa Andriamanitra araka io fanoharana nataonn'i Jesoa io, nefa nisy nandà ny fanasana, isaory an'Andriamanitra ny famindrampony fa isika nankato. Henontsika tsara ny tenin'ny Tompon'ny fanasana," *Efa voaomana ny fanasana amin'ny fampakaram-bady, fa ny nasaina no tsy mendrika. Koa mandehana ianareo any amin'ny fihaonandalana ary asao ho aty amin'ny fampakaram-bady avokoa izay hitanareo', Dia niely eran'ny arabe ny ankiziny, nanangona izay rehetra hitany na tsara na ratsy, ka hipoka ny mpihinana ny trano fampakarana."*

Ry Kristianina havana, misy ny nasaina kanefa nandà ka sambatra isika raha afaka manatona ny fanasana ary indrindra tsy mizaha tavan'olona Andriamanitra fa ny fo amam-panahintsika ~~no~~ mibebaka no tadiaviny, izay no dikan'ny hoe rehefa nahita lehilahy anankiray izy tsy niankanjo ny akanjo amin'ny fampakarambady dia noroahiny io. Ny azo asongadina eto dia tsy hoe manavakavaka Andriamanitra fa asainy avokoa ny olona rehetra ka anjarantsika ny miomana amin'izany. Izany no mahatonga ny pretra alohan'ny kominio milaza hoe "sambatra isika sy izay voaantso amin'ny fanasan'i Kristy",

ilay akanjo io dia ilay akanjon'ny batemy, akanjon'ny finoana, akanjo asan'ny fanehoam-pitiavana, asan'ny famindram-po izay tsaroantsika tsara tamin'ny Taona Masina ny famindrampo no nilaaza azy matetika, mety tsy manana izany io lehilahy voalaza amin'ny fanoharana io. Ady sady dia ny fiainana, ady amin'ny fakam-panahy, io no manova ny finoana ho araka ny sitrak'Andriamanitra ka zary, akanjom-pinoantsika, ilay manova ny finoantsika ho fitokisantsika amin'Andriamanitra. Matetika manaonao foana isika ka tsy manao ny sitrak'Andriamanitra, ny fivelomana ny finoana dia ny fahaizantsika mahay mampitraotra ny finoana sy fiainana andavanandro, io no akanjo ho entintsika amin'ny fakarambady anasan'Andriamanitra antsika, ady sady dia ka mila mitandrina isika.

Izany no ananaran'i Md Paoly ao amin'ny vakiteny faharoa amin'ny taratasiny ho an'ny Filipiana rehefa niresaka ny traikefany izy "*Haiko ny mihafy, haiko ny manam-be. Efa nianatra ny ho voky sy ny ho noana aho, ary ny hanam-be sy ny tsy hanana na inona na inona, na aiza na aiza, ary na amin'inona na amin'inona*" izany hoe manomana ny ankanjon'ny fakarambady izy, hain'i Md Paoly no mampitraotra ny finoana sy ny fiainana andavanandro. Io koa no lazainy amin'ny taratasiny ho an'ny korintianina : " tsy fantatrareo fa izay manao ny raharaha masina dia mivelona amin'ny zavatra ny tempoly" , ny fiainany dia ao amin'izay fanompoana an'Andriamanitra izay. Izany no amerenantsika matetika hoe ny finoana tsy tany malemy anorenam-pangady fa tany lonaka hiasan'ny fahasovan'Andriamanitra fanataro fa rehefa miasa ny fahasovan'Andriamanitra dia manadio ka izay fanadiovana dia mety mangirifiry, mety mafimafy ary marary kanefa izay no miady

ary manantena handresy ka miatrika ny fansana. Tsy mandeha ho azy izany rehetra izany fa mila fiomanana sy ezaka. Ny fahasoavan'Andriamanitra no manampy ny ezakantsika ka mamokatra ny fiainanantsika ka amin'izay ny valisoantsika dia izay fiombonana amin'ny fampakaram-bady ka mahazo hafaliana mandrakizay isika mitoetra ao amin'Andriamanitra. Sambatra isika miombona amin'izany satria tanteraka ao amintsika ilay faminaniana nataon'Izaia mpaminany.

Ry Jesoa Tompo ô, antsoinao tokoa arak'io fanoharana io, antsoin'Andriamanitra Ray ny olona rehetra ho tonga eo amin'ny fanasana ary efa santarinay izany amin'ny fankalazana ny Eokaristia, ampio izahay tena iombona tanteraka aminao, tsy hanatona fotsiny fa hanana fo feno anao ary hahay hanatanteraka ireo asa famindram-po izahay, hahay hanaja ny tontolo iainanay mba handova ity tany trano be iombonana ity sy ho tena taranaka mpanorina izahay fa tsy ho taranaka mpandrava fa hampiombona mandrakariva ny olona ao aminao, ka haharesy ireo sakasakana rehetra ka ho vonona handroso amin'izany ka samy mendrika handray ankanjo ny fampakaram-bady. Ampio izahay tsy hitsara velatsihy fa tena hiombona tanteraka aminao ka hahay hampitraotra ny finoana sy ny fiainana andavanandro. Enga anie ho Eokaristia ny fiainana ho tabernaklanao izahay tahaka an'I Masina Maria. Amen

Mompera Arserveka Mgr Benjamin Ramaroson